



Sesida dals

Communitgà ils

Protocol nr.

10 d'avrigl 2018

13 d'avrigl 2018

267

Incumbensa Tenchio

concernent il mantegniment da champs da classa, d'emnas da project e d'excursiuns
en las scolas obligatorias dal chantun Grischun

Resposta da la regenza

La sentenza dal tribunal federal dals 7 da december 2017 concernent la participaziun da las personas responsablas per l'educaziun als custs da champs da classa, d'emnas da project e d'excursiuns (2C_206/2016) ha procurà per gronda irritaziun en tut la Svizra e chaschunà malsegirezzas areguard la pratica vertenta en ils chantuns. Tenor la sentenza dastgan vegnir mess a quint als geniturs, per occurrenz da scola obligatorias, mo custs ch'els spargnan tras l'absenza da lur uffants. Quests custs dastgian importar – tenor la decisiun giudiziala – tranter 10 e 16 francs per di, tut tenor la vegliadetgna da l'uffant. En quest connex sa basa il tribunal p.ex. sin la pratica dal chantun Turgovia.

Tenor l'art. 15 da la lescha davart las scolas popularas dal chantun Grischun dals 21 da mars 2012 (lescha da scola; DG 421.000) pon vegnir incassadas da las scolaras e dals scholars resp. da las personas responsablas per l'educaziun contribuziuns adequatas per viadis da scola, per excursiuns sco er per champs da classa. Disposiziuns executivas n'existan naginas en chaussa. Ils portaders da scola fixeschan perquai autonomamain, tge contribuziun adequata che po vegnir incassada dals geniturs per questas activitads da scola, uschenavant che la contribuziun na stat betg en contradicziun cun disposiziuns giuridicas. Las consequenzas da la sentenza dal tribunal federal na sa laschan per il mument betg giuditgar definitivamain. Per survegnir dapli clerezza en quest regard e per perseguir in proceder interchantunal coordinà ha il secretariat general da la conferenza svizra dals directurs chantunals da l'educaziun publica (CDEP) survegnì l'incumbensa da la suprastanza d'analisar las consequenzas da la sentenza dal tribunal federal e da tractandar quest punct a la radunanza plenara da la CDEP dals 21 da zercladur 2018.

Ils portaders da scola pon declerar er vinavant che las occurrenzas enumeradas sajan obligatorias. Tenor l'art. 72 da la lescha da scola survegnan las vischnancas contribuziuns per l'instrucziun obligatoria da la scola populara (pauschala per la scola regulara). Latiers tutgan er las activitads enumeradas. Ultra da quai sustegna il chantun champs dal sport da scola voluntar cun contribuziuns tenor l'ordinaziun davart la promoziun dal sport e dal moviment dals 7 da fanadur 2015 (ordinaziun da promoziun dal sport; DG 470.010). Medemamain survegnan las scolas contribuziuns da la promoziun da la cultura dal Grischun per visitas culturalas e per projects culturals. Sch'ils portaders da scola avessan pretendì dals geniturs en l'ultim passà contribuziuns memia autas per champs, per emnas da project e per excursiuns, stuessan els resguardar quai en l'avegnir cun budgetar il manaschi e l'organisaziun da la scola.

Las basas giuridicas existentas sco er las contribuziuns chantunalas menziunadas suttastritgan la gronda impurtanza da champs da scola, d'excursiuns, d'emnas da project e da viadis da scola per la scola grischuna. La regenza è da l'avis che questas activitads correspundian ad in basegn pedagogic fundamental. L'impurtanza per rinforzar il svilup social entaifer il temp da scola obligatoric è gronda. Sche las scolaras ed ils scholars duain percepir e chapir ils umans en lur puncts cuminaivels, èn emnas da project u champs da scola adattads particularmain per quest intent. Er autras cum-petenzas socialas, sco p.ex. l'applicaziun da l'abiltad da cooperar, da l'abiltad da schliar conflicts e dal savair ir enturn cun diversitad, sa laschan sviluppar vinavant – tenor l'avis da la regenza – excellentamain en il context d'in champ da classa.

En il rom d'ina proxima revisiun da la lescha da scola duai perquai vegnir examinà, sch'i duain vegnir surpigliadas per il stgalim primar e per il stgalim secundar l'prescripziuns minimalas areguard la realisaziun da singulas emnas da project e da champ per rinforzar las cum-petenzas socialas.

Sa basond sin questas consideraziuns propona la regenza al cussegl grond d'acceptar questa incumbensa.



En num da la regenza

Il president:

Dr. Mario Cavigelli

Il chancelier:

e.sub. lic. iur. W. Frizzoni